

**Wednesday, March 18, 2026**

**Time - 2:30pm - 2:35pm**

**AKASHVANI AIZAWL**

**REGIONAL NEWS BULLETIN**

**(MIDDAY)**



**SEC DECLARES DATE OF AMC ELECTION**

Mizoram State Election Commission chuan Aizawl Municipal Corporation inthlan vote thlak ni atan thla leh April ni 21 a ruat a, April ni 27 ah vote chhiar a ni ang.

Mizoram State Election Commissioner Dr. H. Lalthlangliana chuan vawiin khan a pisa-ah chanchinbu mite kawmin AMC inthlan chu April ni 21 ah neih tur ani a ti a, vote hi zing dar 7 atanga tlai dar 5 thleng thlak tura ruahman ani tih sawiin AMC inthlan a din tumte tan a hming pek luh theih ni hnukung ber atan tun thla March ni 26 an ruat thu leh candidate inhnuk dawk duhte tan a inhnudawhna ni hnukung ber chu tun thla March ni 30 a nih thu a sawi bawk.

Mizoram State Election Commissioner chuan inthlan that ngaih palh a awm thu hla-ah, April ni 23 chu inthlan thatna neih ni atan an ruahman thu a sawi a, AMC inthlan a vote tla te chu April ni 27 zing dar 8 atanga chhiar tan a nih tur thu leh, inthlan kaihnawih zawng zawngte chu April ni 30 a zawh fel vek tura tih a nih thu a sawi bawk.

Aizawl Municipal Corporation-ah hian ward 19 a awm a, heng zingah hian hmeichhiate tan a hauh bik ward hi paruk, ward no 2,4,5,11 leh 12 te a awm a, a bak ward 13 te chu candidate atana mipa leh hmeichhia nih theih ve ve na ward a ni thung a ni.



**PRAGATI**

Chief Minister Pu Lalduhoma hovin Mizoram Pro - Active Governance & Timely Implementation (Mi-PRAGATI) thukhawm chuan Sairang atanga Thenzawl rel kawng kalna tur chu chinfel thawkhat a nih thu tarlan a ni.

Thutkhawmah hian Sairang - Thenzawl rel kawng survey chungchang sawihon ah Railway thuneituten Thenzawl thlenga rel line kalna tur hi chinfel thawkhat a ni an ti a, heng bakah hian Vairengte - Aizawl inkar 4 lane hnathawh mekah meeting hmasaa sawi lan electric power line sawn chungchang chu chinfel a nih tawh thu tarlan a ni a. He 4 lane kawngpui laih mek hi kilometre 90.110 a thui tur a ni a, heng zinga kilometre 60.295 chu Greenfield Alignment tura duan a ni. PM SHRI (Pradhan Mantri School for Rising India) Scheme kalpui mekah Mizorama sorkar school 35 te chu PM SHRI kalpuina atan thlan an ni a, thawh ruk (6 phase) a kalpui tur niin a thawkhatnaah school 22 ah hmalak a ni a, PMJVK hnuaiah hian Mizoramah project 104 approved tawh a ni a, an zinga 84 chu thawh zawh tawh niin, thawh mek 18 a awm a. Sanction beisei mek a awm nual bawk.

Vawiin thutkhawmah hian Aizawl Western side By-pass Road laih mek te, NHIDCL hmalakna te, PM SHRI Scheme hmalakna te, PMJVK hmalakna te leh Railways hmalaknate an thlirho a. Aizawl Western side Bypass hna hi zaa 19. 56 thawh tawh a ni a. Kawngin paltlang rama khawsa raltlante sawn dan tur te, mimal quarry neituten zangnadawmna an phut chungchang te, kawng laihin a nghawng huan thlai chan te zangnadawmna te, forest clearance leh leivung paihna chungchanga harsatna awm mek te an sawi a ni.

### ***Voicecast***

*Mizoram Pro - Active Governance & Timely Implementation (Mi-PRAGATI) hi state chhunga hmasawmna hnathawh lian zual te vil a, harsatna an tawhte chin fel dan dappuitu tur leh a tul anga department hrang hrang thawhhona tichak tura din a ni a. Mipuite tana rawngbawlna tam zawk, langlang leh rang zawk kalpuina tura ruahman a ni.*



### **SOUTH CHAWNGTUI**

Hnahtial District chhunga South Chawngtui khua te chuan nikum kum 2025 a an hmarcha thar atangin ₹ 9,984,000 (Nuai sawmkua pakua,singriat leh sangli) man an hralh.

South Chawngtui khuaah hian chhungkaw za sâwm paruk(116) ten thlawhhma neiin buh leh sawhthing karah Hmarcha hi na ching a, an thar chhuah zawng zawng hi Quintal zathum sawmriat pali (384) leh kg sawmli panga (45) a ni a. Pu Lalhlengdika ten thar tam berin quintal sâwm pathum (13) an thar a, hmarcha hi an hralhna rate hi a in ang lova a chawhrualin kg ah cheng zahnih sawmruk(₹ 260) vela hralh ang an ni.

Hmarcha te hi mahni rem chan dan ang ang a hralh niin Vai ho hnenah an hralh vek a, a hralh to ber te hian Kg ah ₹ 360 a an hralh laiin a hralh tlawm ber ho in Kg ah ₹ 250 in an hralh a ni.



### **TOURISM MINISTER**

Tourism Minister Pu Lalnginglova Hmar chuan Mizoram nuam tak chu thawnthu mawi tak sawi chung zelin khawvel ram zau zawkah tarchhuah tumin hma an la tih a sawi.

Nimin khan Bana Kaih hnuai 'District Level Tour Guide' training buatsaih chu 'State Institute of Rural Development and Panchayati Raj (SIRD&PR), Durtlangah Tourism Minister hian a hawng a, Tourism Department in hma a sawn zel chu lawmawm atih thu a sawi.

Pu Lalnginglova Hmar chuan Tourism Department chu Mizoram Department zinga budget tlem leh te ber pawl ni mah se, eizawmna zahawm thahnem tak siam thei turin ke a pen mek a ti a, Mizoram nuam tak chu thawnthu mawi tak sawi chung zelin khawvel ram zau zawkah tarchhuak turin theihtawp an chhuah tih a sawi.

Minister chuan Tourism an tuipui vanga training a telte chu a ngaihlu hle a ti a, Tourism Sector chu eizawna zahawm tak a nih theih nan theihtawp chhuah tlan a ngai tih sawiin Mizoten hnamdangte an lo chhawn dan chu chhuanawm atih thu sawiin Tour Guide tha tak ni thei turin trainee te chu an theihna leh thiamna te Mizoram hmasawna atan hmang turin a fuih a ni.

Tour Guide te tana training chu Tourism Department in khualzinte mumal zawk a enkawl an nih theih nan a duan niin, mi 110 training tura ruahman a ni a. Tun hi a batch hmasa ber niin mi 40 an tel phawt dawn a. batch dang pahnih la awm tur a beisei a ni.

Tourism Department Deputy Director Pi Rachel Lalrinhlui chuan Technical Report pe in, training dil zingah beisei aiin Aizawl District pawnlam an tlem deuh tih a tarlang a. Hlawhtling taka training chhuak te chu Tourism Department atangin Provisional Certificate kumkhat chhung atan pek an nih tur thu leh, a hnuah kum 2 atan register an nih theih tur thu a tarlang a. Kum 2 hnuah pawh an tihthat dan azira renew zel theih tur a nih thu a sawi a ni.

